

四庫全書

史部

欽定四庫全書

史部

山西通志卷二十七

詳校官監察御史_臣查善長

檢討_臣德生覆勘

總校官進士_臣朱鈐

校對官編修_臣勵守謙

謄錄監生_臣沈立銘

欽定四庫全書

山西通志卷二十七

山川

十一

保德州

蓮花山在州南一里自高地峻五十餘里至下流磧復起至大塢墩分五支東一支為東廓山西一支為西廓山支麓胥臨黃河支至小塢墩又分三小支入城環保德皆山在東南者自河曲界高地峻山

暨奇嵐界奇嵐山發脉在西南者亦自奇嵐山來逶迤相屬隨地異名

鳳凰山在城內一名鐵山

馬頭山在州東二十里

鷹窩山在州東六十里

石門山在鷹窩嶺下峭崖峻壁魏如削出兩勢相鬬呀然成谷疊石為岸跨岬為橋

窩弓山在州東六十里

檀帽山在州東六十里窰屹臺山半有石洞容千人

翠峰山在州東八十里形似覆斗林茂巒秀為州鎮山
獅子山在州東南二十里下流磧

孤山在州東南三十里全家坪

郝家嶺在州東南三十里

劉家山在州東南五十里

黃龍山在州東南六十里

倒座山在州東南六十里

堂子山在州東南六十里有石洞容六十人

袁家山在州東南七十里

赤山在州東南八十里山多楓霜後胥赤

土門山在州東南八十里

賀家山在州東南九十里

栢山在州東南百里

潘家山在州東南百里

桑林山在州東南百里

蒼水山在州東南百二十里水色黝

銀爐山在州南十里井兒窰村

寨山在州南三十里

羊頭山在州南四十里

峯子嶺在州南五十里即小塢墩

石門山在州南六十里大塔鋪

麥子山在州南七十里有石洞

楊家嶺在州南九十里

伊山在州南百里土人傳為伊尹寓此

王家嶺在州南百里

黃金山在州西南六十里

禪師崖棧在州西南六十里崖半有石洞

黑石崖棧在州西南七十里石洞深杳莫測燃松炬入

二三里輒聞水聲洞外山半石徑上聳蒼崖下臨黃

河袤二十里

神山在州西南八十里

花花崖在州西南八十里

野人山在州西南九十里

黨家嶺在州西南九十里

韓家嶺在州西南九十里

木瓜崖在城西後木瓜產絕崖下即宋呂惠卿屯田地
與河北木瓜園對望

飛龍山在州東北十里康家灣

觀音峁在州東北十里

出炭

逍遙山在州東北二十里一名腰莊

出鐵器

石梯山在州東北二十里

天橋峽在州東北三十五里冬月積冰成橋土人呼為
天橋水經注湍水左合一水出善無縣故城西南八
十里其水西流歷于呂梁之山而為呂梁洪其巖層
岫衍澗曲崖深巨石崇竦壁立千仞河流激蕩濤湧
波襄雷濟雲洩震天動地昔呂梁未闢河出孟門之
上蓋大禹所闢以通河也司馬彪曰呂梁在離石縣

西今於縣西歷山尋河乃無過岨至是乃為河之巨
險即古吕梁矣在離石北以東可二百有餘里按道
元紀里惟天橋峽可當之雖指不敢定殆昧壁立千
仞之為形擬辭也又謂平魯西有呂梁山亦未覈闔
百詩謂天橋去離石四百餘里此又忘古離石山當
繇今臨縣赤壁嶺北計里不當繇永寧州治計里也
峽石上鑿字云治平元年甲辰冬十一月望
巡河至此餘胥剥落

缺張

倒迴谷溝上有橋金僧才公建在州東北三十五里

趙寧岡在栢森村起伏盤踞如龍相傳宋趙寧鑿岡深一丈二尺見七蘆根血流入河云

孫家溝 草廠溝 苦水溝 胥在城內

西莊溝 狄家溝 胥在州北三十里

東溝水在東城下出岔道村後至東關入河

楊家泉在東坡下平地噴湧

老鴉泉在東門外東溝水出石峽

康家灘在州東五里

石板溝在州東五里

郭家灘在州東十里有堰

張家灘水在州東十里河沒

熱密河溝在州東十五里

腰莊水在州東二十五里由郭家灘入河

蘆子溝水在州東三十里由張家灘入河

雙井在州東六十里

朱家川在州東六十里發源寧化山南流遠王家寨轉而西至石穴鋪過橋頭村下流磧由花園村入黃河龍潭在州東七十里窩弓村

濟道溝在州東南二十里

峽查溝在州東南三十里

王湖渠在州東南三十里

赤泥溝在州東南五十里

南溝井在南門外有二水繇峽出

深溝水在州南三十里

四井潭在州南四十里山下四井色黝有魚

卧龍池在州南四十里石窟水恒清澈雖暴雨不汨下

有蛟龍潛焉

石堂水在州南四十里由韓家川入河

龍池在州南五十里石澗中周十丈有奇禱雨輒應

鴉前塔溝在州南五十里

土門溝水在州南六十里由林遮峪入河

扒樓溝水在州南八十里由神山入河石燕出此青元
大小不一頭項羽毛胥具

寺河塔溝在州南九十里

鴨頭川即馮家川在州南九十里水由東南流入黃河
號風溝在州西南六十里有石竅炎暑寒風

神池在州西南八十里

西溝井在西門外水恒清

西溝水在西城下出峰子嶺由下園頭入河

馬家灘在州西二里

王家灘在州西三里

煤灰溝在王家灘

張家谷沱在州西六里 以上明萬歷間多沒於河今

漸復

石梯灘水在州東北二十里一名楊家灘

臥龍溝在州東北三十里出臥龍石

朱家川晁端稟鷹窩嶺橋記定羌南二十里有峻嶺焉

蓋即所謂鷹窩嶺也嶺下大澗源甚遠傳曰自寧化
雪山神谷掌流入邊地在朔州之西神武會谷之東
溫泉在石梯山側甘溫清白轉壑飛流自高地峻曲折
逶迤三十里轉至峽口三疊入河 溝口上下諸泉
胥湧珠噴玉

河曲縣

火山在縣西七里高一里盤踞二里山上有孔以草投
其中烟焰上發可熟食草木胥不生上有礪砂窟下

有氣沙窟黃河經其下似遇覆釜而河為之曲山後
有大石有禹廟水不能浸宋名火山軍以此 金志
河曲有火山黃河

鵬黃崖在縣東十里宋元祐七年石刻曰昔有一鵬鳥
于此為窠故名

強梁山在縣東南三十里高一里盤踞一里

杜家山在縣東南四十里

望羊山在縣東南六十里高一里盤踞一里

葫蘆山在縣東南九十里

鐘山 鼓山胥在城南大澗河濱 二山形似鐘鼓水

經其下有噌吰聲

火山在縣南三十里高一里盤踞三里峯似筍

翠峯山在縣南八十里遞高二十里綿亘六十五里形如覆斗羣峰拱峙

石洞二一在縣西五里王翼莊可容千人一在縣東九十里吳峪村高一丈六尺廣二丈深三丈有奇

韓家嶺在縣西北四十里

赤崖在縣西北四十里即河會村古名赤崖村土色胥赤窰窰數十胥險要上胥蛤蚌腐甲豈龍門未鑿河嘗經山巔耶

黃魏梁在縣北四十里高埒翠峯可二里盤踞三里虎頭巖明副總兵艾萬年疏設伏河曲有馬鎮虎頭巖石臺山西川之捷

石臺山

黃河在縣西五里東北自古東勝州境轉而西流八十里至平泉村復轉西流九十里至天橋子南流經保德興臨永寧寧鄉石樓永和大寧吉鄉寧河津繁河永濟諸州縣東折經芮城平陸垣曲諸縣入河南澠池濟源縣界至孟津其在永濟城西為河濱祠禹平水土分九州其一為冀今之山西河朔直隸皆其疆域三面皆河東北阻陰山一帶故河折而南流為冀西河至華陽折而東流為冀南河至大伾折而北

流為冀東河 元志臨川朱思本曰自洮與河合又
東北流過達達地各八百餘里過豐州西受降城折
而正東流過達達地古天德軍中受降城東受降城
凡七百餘里折而正南流過大同路雲內州東勝州
與黑河合 古傳禹跡旁有禹廟土人言河中花木
兩岸橫亘有道可涉其說似幻然黃河入河曲境東
北由偏關來西由府谷北境來中間石壁剝削河出
其間胥似斧鑿謂之禹跡也信然 龍口在縣北九

十里黃河西岸大同紀形似龍口聲似雷鳴一名厓
門土人名龍門 河曲黃河東北二十五里有棘峪
灘西北三十里有五門灘七十里有棘鍼韭菜二灘
八十里有王鍼榆樹二灘九十里有太子娘娘二灘
夏秋多鳧雁相傳薄太后漢文帝至此居民時得古
瓦有萬歲富貴字可作硯

平泉在縣西北八十里平地湧出蓄石白之半汲之不
縮不汲不盈流三里入黃河

石井在縣東一里廟溝崖下泉迸石出冽而甘

葬溝在縣東一里

石佛河在縣東南九十里接奇嵐長流溝西經保德入

黃河

五井在南城內五方相綴形若梅花一名梅花水

井浴溝在縣南一里

大澗河在縣南一里源出朔州西流七十里入黃河

沙泉河在縣南六十里源出鎮西衛五所嶂經縣境至

保德入黃河

倒迴溝在縣西南二十五里保德境溝上有橋 天橋

東北至縣城路尤險

大澗水在縣西百步源出朔州西北西流七里入黃河
龍門溝在縣西一里諺曰河曲縣保德州十里路九條
溝

水井泉在縣西北十里泉出崖下冬溫夏寒志名凝碧
泉

得馬水在縣西北四十里西流入黃河相傳尉遲敬德得馬於此

鎮口河在縣西北四十五里南流入黃河

白鹿泉在縣北六十里不冰

榆泉在縣東北三十里

賈胡疇泉賈胡疇有泉遼人常越界而汲火山軍巡檢何灌請申畫界堠遏其來致忿而舉兵灌迎高射之發輒中或著崖石皆沒鏃敵驚以為神遂巡歛去後

三十年遼蕭太師與灌會道曩事數何巡檢神射灌
曰即灌是也蕭矍然起拜

解州

中條山一名陟山西起蒲坂袤數百里東連王屋州境
羣山胥中條山也

龍潭洞在州東白家莊繇莊南入洞溝八里斗折上東
崖崖間多懸鐵牌以酬雨也洞口形似銀錠裁容一
人胥石角嵯岬禱雨者以燭引絙入可數丈折腰越

尖石門漸入漸敞上頂胥石稜參差水繇石罅散下
如春雨巖間題勅封三島仙姑東面黑龍潭南北五
丈東望渺無際投瓶拔出有水輒雨若燭滅多迷道
云

白徑嶺在州東南十五里膽礬窟東一名石門 州志
面石門之嶺背鳴條之岡石壁左右參天路通平陸
縣 唐志河中府有石門府

分雲嶺在白徑嶺東十五里乃中條巔也 嶺峙鹽池之

上相傳為尸鹽澤下有風谷洞形似半井側有鹽風洞洞口似盆上有天井山嶺名分雲者以其出雲輒東西流布也王緯鹽池廟記條山之下有風谷焉每夏仲月應候而至則吹沙石摧林木其聲隆隆俗謂之鹽雨風鹽法志鹽花得此一夕而成

天井谷在風洞上四面陡絕一逕透巔

五龍谷在州南四里荻子谷東州直南五里又東有石巖巖水東峽中半崖懸溜如噴雪即噴雪巖也上書

酒島二字

青龍峪在五龍峪西

石樓峪在青龍峪西

雲首山在五龍谷南五里

橫嶺在五龍谷口繇谷西上十五里乃中條山脊也

詳
內

城上有墩蹟北漢防宋巡邏之路橫嶺南為山之陽

跨芮城平陸橫嶺北為山之陰跨解州安邑夏縣聞

喜

弓張溝繇橫嶺北而下

堡子谷在弓張溝東

仙女洞在堡子谷東一名元女洞其中積水成潭名黑龍潭

大虎谷在仙女洞東十里谷中有將軍堡堡後有鳳凰背背西過連雲棧至橫嶺有陽關寨寨後有膽礬窟其旁有百藥草

膽礬窟在橫嶺東窟有二

紅臉溝西距虞鄉王官谷二十里為州西境上有靜林
寺

桃花洞在州西南紅臉溝東十五里昔人十月行中條
巖下桃花片片遠浮澗水而至緣澗跡之杳然莫窮
其際遂名桃花洞

白龍谷在桃花洞東三里

直岔嶺在白龍谷東八里繇谷陟嶺

荻子谷在白岔嶺少東

卑耳山後漢地理志卑耳山解縣西南齊桓公西伐所

登

逍遙坡在州西北二里女鹽池北岸

紫金山在州北二十里

舊產人參

安邑縣峨嵋嶺北為萬泉

之孤山孤山為稷山之稷神山又南為紫金山袁延
峨嵋坡逍遙坡此胥由橫嶺北連亘而東者也

峨嵋坡在鳴條岡北東自曲沃西抵黃河其陽跨聞喜
夏縣安邑猗氏臨晉虞鄉滎河州北境亦倚坡焉袁

延至東五里鹽池北岸

谷口泉 蒼龍泉胥在中條山

涑水在姚暹渠北水經涑水又南過解縣東水經注涑水又西逕郇城服虔曰郇國在解縣東郇瑕氏之墟也

解鹽池 女鹽池 城北灘 城東灘 六小池胥詳鹽法志

靜林澗在青龍峪東源出中條山巔爾雅所謂沃泉懸

出者也北流經靜林寺東寺僧暨居民引水以時刻計遵唐司空圖定王官谷引水法又北流經紅臉溝入虞鄉洳水灘

張公泉在靜林澗東三里山谷中泉及澗水勢洪迅舊有底張堰以障州西境水俾無入女鹽池歲旱命數十老婦執箕帚廟張公泉輒雨漢董仲舒奏江都王曰求雨之法損陽益陰願大王無收廣陵女子為人祝者一月租賜諸女巫巫無大小皆相聚於郭

門為小壇以脯酒祭即此意也

胡村澗在張公泉東五里源出中條山陰

桃花澗在胡村澗東五里源出中條山巔泉流細而緩
小水澗在桃花澗東二里源出白龍峪

荻子峪水在小水澗東一里胥北流入女鹽池

大水澗在白龍峪東三里源出五龍峪噴雪巖南十里
北流至城南遶城而西會小澗水入女鹽池水勢最
洪迅築五龍堰以防之堰遶城南而西

堡子谷水在大澗水東二里源出中條山北流入鹽池
南溝

長樂灘在鹽池北七里峨嵋坡陰周二十餘里北受姚
暹渠水西南能破諸堰有長樂堰以防之灘中生魚
遠望烟波明滅

姚暹渠在鹽池北十里古名永豐渠隋大業間都水監
姚暹重開源出夏縣平咸谷經安邑城北西流六十
里入州境又西六十里入臨晉縣之五姓湖達於蒲

州入黃河餘多塞舊有姚暹渠堰水漲則決堤入長
樂灘女鹽池 唐開元中天水姜師度奉詔鑿無鹹
河以溉鹽田剡室廬潰丘墓甚多

東膏腴灘在長樂灘西北數里西為西膏腴灘又西北
十五里為西辛莊村灘東起賈村西接臨晉諸灘亦
時北受姚暹渠水南入女鹽池城北灘

洗馬灘在西辛莊北二十五里東北為南扶灘西北為
衛諸灘衛諸西北十里為三婁灘東二十里為羅叉

灘又北十五里有小張塢灘胥半花鹽地

城內灘在北隅

新河在青龍峪西起石樓峪麓自東迤西洩石樓東來諸水俾趨小潮橋以入黃河

金盆水源出中條山趨鹽池南溝東有關氏祖塋一名小聖溝水有金盆堰防之又東有小龍五澗水

二郎谷水 三郎谷水胥出中條山陰北流趨禁牆有蟹房常平西姚三堰以防之

常家月堰 蝦蟆堰胥在西姚村

安邑縣

中條山在縣南二十里 金志有中條山稷山鹽池涑水 五朝志安邑有鹽池銀冶銀冶當在中條山宋靖康紹興後銀冶久無 山隸縣境共袤四十一里四丈二尺

虞坂在二郎谷東五里有青石泉經坂麓

車輞谷在分雲嶺天井谷東兩山夾道盤礴呈奇下有

車輞泉 谷有銀砂洞有禁

二郎谷在車輞谷東中多巖竇

鳴條岡在縣北三十里玉鈞山西東接夏縣聞喜縣界
通考堯舜舊都今縣西有鳴條陌湯與夏戰於此
括地志出蒲州安邑縣北三十里南坂口即古鳴
條陌也鳴條戰地在安邑西 縣志舜陵在鳴條岡
之陽高三丈甃以甃方四十步有奇内外地百畝有
奇

嵯峨嶺在縣北四十五里鳴條岡西上多平壤東自曲沃西抵黃河嶺隸縣境東西袤二十七里黃河距縣百餘里而近河之裏中條山中條之裏鹽池互為高抵北則姚暹渠涑水環繞於後渠之表為鳴條岡涑之表為嵯峨坡而稷山之稷神山萬泉之介山亦距縣百餘里而近

玉鈎山在縣東北十五里由聞喜嵯峨嶺北而西峭峰環曲以形似名

栢王山在縣東北六十里山多古栢東隸夏西隸萬泉
隸縣境袤二里

鹽池在縣西南通考有鹽池與解為兩池見鹽法志

涑水在縣北三十五里源出絳縣橫嶺山乾洞經縣境
北猗氏南西流入臨晉五姓湖隸縣境共袤二十三
里 水經涑水又西南過安邑縣西

苦池灘在縣東十三里夏縣東山平咸谷諸水胥西匯
於此以達姚暹渠

苦水河即苦池灘之水道也

湧金泉在縣東南十里夏縣西南十五里源出牆下村西入縣境黑龍潭鹽池得此水始結鹽花

東郭灘在縣東南十里廣數十頃有大堰以障之禁無得開種

黑龍潭在縣東南十五里近鹽池有堰以防之深不可測渚水黑色唐開元中嘗置龍池宮於此

青石泉在縣東南三十里源出中條山繇青石槽經東

郭村入黑龍潭

車輞泉在縣南二十里源出中條山車輞谷後涸

淡泉在縣西南十六里鹽池北岸泉有八眼一名由泉池水胥鹹此獨淡建甘泉亭以濟撈鹽者之渴

野狐泉在縣西南十八里鹽池北岸味甘

祝志云疑即淡泉

姚暹渠舊經縣城內明隆慶四年改繇城北西入五姓

湖 宋天聖四年閏五月陝西轉運使王博文等言

準敕相度開治解州安邑縣至白家場永豐渠行

舟運鹽經久不至勞民按此渠自後魏正始二年都水校尉元清引平坑水西入黃河以運鹽故號永豐渠周齊之間渠遂廢絕隋大業中都水監姚暹決堰濬渠自陝郊西入解縣民賴其利及唐末至五代亂離迄今湮沒水甚淺涸舟楫不行詔三司相度以聞

玉鈎泉在玉鈎山下一名玉女泉水光澄澈禱雨多應南入姚暹渠後涸

窰子溝 磨兒盤胥在中條山內水所經流因地立名

能助黑龍潭水勢

夏縣

中條山在縣東五里 太行山志山在平陽府安邑縣
西北諸山皆其支脉是謂夏縣為中條太行之界也
唐陽城及進士第乃去隱中條山

瑤臺山在縣東五里虞坂東高一里孤峰蒼峭商相巫
咸巫賢墓在山麓巫相祠右有天聖宮隋書名巫咸
山地志瑤臺山巫咸巫賢隱居處名巫咸山後更

名 金志有巫咸山中條山淡水 馬化龍記地道
記曰咸山在安邑南考爾雅左高咸丘凡山之形左
高者謂之咸瑶臺山左高右下故謂之咸商時巫公
居其下遂名曰咸 郭璞巫咸山賦序巫咸以鴻術
為帝堯醫 水經注承鹽水流逕巫咸山北地理志
曰山在安邑縣東海外西經曰巫咸在女丑北右手
操青蛇左手操赤蛇在登葆山羣巫所從上下也大
荒西經云大荒之中有靈山巫咸即巫盼巫彭巫姑

巫真巫禮巫抵巫謝巫羅十巫從此升降百藥咸在
郭景純曰言神巫上下靈山採藥往來也蓋神巫所
遊故山得其名矣谷曰嶺上有巫咸祠

巫谷在瑤臺山白沙河源北

雷公洞在瑤臺山右

翠巖山在縣東二十里綿亘數十里北接聞喜界

溫泉山在縣東百里有礦洞

玉溪洞在縣東南七里中條山谷間洞深一丈五尺廣

一丈石崖上書玉溪頭三字俯瞰溪流相傳司馬溫公讀書於此通谷村洞塑公像土人傳公嘗讀書

觀音寺中

雲谷山在縣東南三十里盤踞數十里數峰崇聳中有大谷谷中雲四起輒霖雨

將軍嶺在雲谷山北峯一名古石碑嵯峨礫砢上有古將軍嶺在雲谷山北峯一名古石碑嵯峨礫砢上有古

洞洞中泉水潄而復流陟巔見鯀海洪河

望川在縣東南五十五里三州志中條山有望川夏

后避暑離宮之所

虞坂在縣南十五里 五朝志夏縣有巫咸山稷山虞坂土人名三橋坡

柳谷在縣南十五里巫咸山東十五里唐陽城寓居於此舊志謂即柳宗元居恐未核集覽謂陽城隱柳谷乃張掖郡柳谷尤謫 姜洪陽公廟記夏縣治南十里條山之下柳谷之口地曰陽公鄉即唐諫議大夫國子司業道州刺史所隱處也舊有陽公廟按韓昌

黎柳柳州集云家于北平隱于條山則公家世固北平隱居夏縣久遂為夏縣人

栢塔山在縣南二十里王峪口東峪中水出口流經其下古栢千株中有栢母林中建寺寺後建塔故名後塔毀王翰詩翠竹推梢失鳳凰詩注人呼山為鳳凰頭山又名抱珠山

北晉村洞在縣南三十里中條山村後有洞溪水遠流洞前禾草經霜不涸相傳張果隱此

王峪口在縣南橫嶺東西距王官峪百里嶺東水入黃河嶺北水繇峪出口故名

風洞在栢塔山後石巖中深不可測風自竅出有聲明知縣姜洪冀大其竅遂無風聲

史家峪在栢塔山東水經其下

石碓山在縣西北七十里石碓里即稷王山之支山也

石碓即峨嵋坡高阜

稷王山在縣西北七十里接稷山界下有蛇虎澗相傳

后稷棄於此

方山谷在縣北橫洛渠源此

鳳凰山在縣東北四十里柳谷東二十里峰殊秀相傳

鳳集此

涑水在縣西三十里源出絳縣橫嶺山乾洞伏流地中
復出西經聞喜入縣境至安邑合姚暹渠

李綽堰在縣南舊一名永豐渠源出平陸至本縣王官
谷口出山北流合史家谷雕崖溝等水至卓義橋匯

為一折西三里名姚暹渠又折南匯巫咸河入五姓
湖明隆慶五年巡鹽部永春修築堅固

湧金泉在縣西南十五里牆下村

蓮花池二一在城中西北隅環一頃八十畝一在城東
北隅差狹二池皆植蓮

青龍河在縣北三十里勢曲如龍匯入橫洛渠

高德鐵堰在縣北五十里接聞喜境中條山谷水北
注聞喜美陽川大澤中北溢為小澤復南溢入縣境

青龍河近山古建石堰督功者高德也故名

橫洛渠發源縣東北周村方山諸谷西流至縣西北尉
郭鎮滙縣北趙村北津諸河至禹王城西南入白沙
河

白沙河一名巫咸河一名堯稍水平咸水入則鹽不復
結土人或名無鹽河

司馬渠相傳溫公濬

玉溪明馬駢玉溪賦玉溪在於禹城東南枕陰崖焉後

倚中條前障瑤臺載瞻柳谷悵唐諫之隱烟霞俯瞰
巫岫弔商相之丘草萊况溫公而是樂厭塵囂而此
來大賢過而山川增重蕙帳空而草木不衰馬子生
公之里慕公之風爰約仙客聯步策杖而往一窮焉
於是攀藤蘿躡危峰掬素流撫青松倏羣動之響壑
渺孤鶩之浮空

平陸縣

中條山在縣北四十五里西起蒲州雷首延袤數百里

迤邐而東直接太行縣西衍一支自五龍廟至十二連城丹壁蒼崖南俯大河乃砦

三門山在縣東五十里黃河中 史記正義禹鑿此山

三道河水故曰三門也 司馬光謁三門禹祠詩栢

映孤峰短銘書絕壁高

詩注木際孤峰甚細而高上有小栢者舊相傳不知幾何

年矣而止長尺餘人莫測其理趙冬曦三門賦序砥柱山之六峯者

皆生河之中流蓋夏后之所開鑿其最北有兩柱相對距岸而立即所謂三門也次於其南有孤峰揭其

峯頂平濶夏禹之廟在西有孤石數枚圓如削成復次其南有三峯東曰金門中曰三堆西曰天柱湍水從黃老神前東流湍激蹙於蝦石折流而南激於三門包於廟山乃分為西流淙於三峯之下抵於曲隈會流東注加以兩岸夾水壁立千仞盤紆激射天下罕比時以內兄牛氏壯而遊焉相顧賦之以紀奇跡舊唐志天寶三載太守李齊物開三門石下得戟大刃有平陸篆字因改河北縣為平陸縣 金陝州

湖城鎮二三門集津 興定元年六月乙丑設潼關
使副及三門集津提舉官 金南遷後置提舉三門
集津南北岸官

砥柱峯在三門東迤南黃河中高數仞石形如柱禹貢
東至於砥柱即此 實用編底柱在平陸縣東五十
里大河自蒲津而來至是微折而南是柱正當轉曲
之間在三門山之陽紫金駱駝二峯之西其形如柱
植立中河

老君爐砥柱側黃河中相傳老子煉丹於
此險不可升上流有列石似川字亦傳老

子錄此
渡河焉

米堆山在砥柱東

關流在砥柱東上激六

峯下阻十九灘

孔安國書傳砥柱山河水分流包

山而過石見水中若柱然也

括地志底柱俗名三

門山硤石縣東北五十里黃河之中

尚書正義同

水經河

水又東過砥柱間水經注砥柱山名也昔禹治洪水

山陵當水者鑿之故破山以通河河水分流包山而

過山見水中若柱然故曰砥柱也三穿既決水流䟽

分指狀表目亦謂之三門矣山在虢城東北大陽城

東也劉向叙晏子春秋稱古冶子曰吾嘗濟於河鼃
銜左驂以入砥柱之流當是時也從而殺之視之乃
鼃也考史遷記景公十二年公見晉平公十八年復
見晉昭公旌軒所指路直斯津從鼃砥柱事或在茲
河水翼岸夾山魏峯岐舉羣山壘秀重嶺千霄鄭
康成按地說河水東流貫砥柱觸關流今世所謂砥
柱者乃關流也砥柱當在西河未詳也蓋康成所說
非自西河當無山以礙之自砥柱以下五戶以上其

間一百二十里河水竦石桀出勢連襄陸蓋亦禹
鑿以通河疑此關流也其山雖闊尚梗湍流漱石雲洄
環波怒溢合有一十九灘水流迅急勢同三峽破害
舟船自古所患漢鴻嘉四年楊焉言從河上下患砥
柱隘可鑄廣之上乃令焉鑄之裁沒水中不能復去
而今水益湍怒害甚平日魏景初二年二月帝遣都
督沙兵部監運諫議大夫寇茲帥五千人歲修治平
河岨晉泰始三年正月武帝遣監運大中大夫趙國

都匠中郎將河東樂世帥衆五千餘人修治河灘事
見五戶祠銘雖世代加功水流湍急濤波尚屯及其
商舟是次鮮不踟躕難濟故有衆峽諸灘之言五戶
灘名也有神祠通謂之五戶將軍亦不知所以也

都穆游砥柱記三門之廣約二十丈其東百五十步
即砥柱崇約三丈周數丈相傳上有唐太宗碑銘今
不存蔡氏書傳以三門為砥柱州志亦謂砥柱即三
門皆謬誤又隋書大業七年砥柱山崩壅河逆流數

十里今砥柱屹然中流上無土木而河之廣僅如三門奚有崩摧而壅河逆流至數十里之遠蓋距河兩岸皆山意當時或崩遂以為砥柱而書之也 宋張舜民畫墁錄禹貢曰砥柱析城至王屋陝府三門是也絕河流過若山石牆然鑿為三門河經其中東洋如小城狀即析城也禹廟在西潭有寺下望砥柱上百步屹然中流高數百丈尺銘勒其上但取稍平處或險處互坐一峯之間其字方可尺餘魏公撰文正

字薛純稷之子也每欲印搨伺天氣清明先維舟砥柱下梯而陞上數日不可竟俯視洪流足酸目眩用是難得真本元符中大水壞三門一夕寺廟皆失略無了遺銘亦失數十字宛丘張耒明道雜志掌禹錫學士厚德老儒而性涉迂滯嘗言一生讀書但得佳賦題數箇每遇差考試輒用之用亦幾盡嘗試監生砥柱勒銘賦此銘今具在乃唐太宗銘禹功而掌公設記為太宗自銘其功宋渙中第一其賦悉是太

宗自銘

傳巖在縣東二十五里隱賢社聖人澗上兩山之峽曲

岸迴巒五朝志河北有砥柱山有傳巖通典平

陸有傳巖穴吳山東聖人澗東十里為砥柱峰

書說命說築傳巖之野孔傳傅氏之巖在虞虢之界

通道所經常使胥靡刑人築護此道說賢而隱代胥

靡築之以供食

今運鹽道也

水經注沙澗水北出虞山東

南逕傳巖歷傳說隱室前俗名之為聖人窟孔安國

傳傳說隱於虞虢之間即此處也傳巖東北十餘里
即巖軫坂指南北之路謂之軫橋傳說傭隱止息於
此高宗求夢得之是矣唐呂溫傳巖銘序昔殷高
宗恭默思道至誠動天天將報之以說為瑞審形夢
求實得於此貞元九年予繇鎬徂洛息駕於虞虢之
間升墟瞰原髣髴其地遠跡雖昧清風若存乃作傳
巖銘路史傳大繇國唐表云黃帝後夏封之在虞虢之間
在河東大陽北十里有顛軫阪說版築之所有傳虛傳巖傳說之祠古之

北虞今隸平陸地多傳姓尸子云傳巖在北海之洲
妄也 張淵觀象賦傳說登天而乘尾注傳說一星
在尾後傳說殷時隱於巖中殷王武丁夢得賢人圖
畫其像求而得之即立為相死精上為星乘尾在龍
駟之間 王維登河北城樓詩井邑傳巖上客亭雲
霧間

吳山在縣北五里自中條山袤亘而南山高平上胥民
田下建秦伯祠 戴延之西征記河東鹽池東吳坂

登七山原每登一原輒峭拔迤十里原土平曠不知
巨極 杜預曰仲雍支子別封西吳虞公其後也

水經注交澗水出吳山東南流入河河水又東路澗
水亦出吳山東逕大陽城西西南流注入於河 劉

昭注大陽有吳山上有虞城杜預曰虞國也帝王世
紀曰舜嬪于虞虞城是也亦謂吳城史記秦昭王伐
魏取吳城即此城也皇覽曰盜跖冢臨河博物記曰
傳巖在縣北 括地志中條山亦名吳山 通典吳

山即吳驥垂耳駕鹽車之所 金志平陸有吳山黃
河 日知錄漢書地理志河東郡大陽吳山在西上
有吳城史記秦本紀昭襄王五十三年伐魏取吳城
是也周武王封泰伯後於此是為虞公後漢郡國志
大陽有吳山上有虞城虞城之書為吳城猶吳仲之
書為虞仲也

白徑嶺在縣東十五里為分雲嶺嶺出雲東西分布
下有風谷洞中條之巔北對鹽池

野馬圪塔在縣東四十五里地近清澗溝溝底有石寨
山壁鐫將軍黃巖四字縣志巖即馬岱也少孤與母
避難僑黃姓室因名黃巖時牧馬於此長投馬超復
姓

晚照臺在縣東八十里錐子山支層峯盤岫

錐子山在縣東九十里孤峯似錐層巒旁列分之為晚
照臺雲流霞布掩映箕山 唐志三錐山當即錐子
山隋志虞鄉有石錐山

箕山在縣東九十里傳巖東四十里又東北為王屋山
旋徑危峯其形似箕相傳許由巢父隱此上有許由
塚下有清澗即巢父洗耳處也山下有錫窟說見遼

州

錫窟在箕山下白玉竅也

大通嶺在縣西北四十里嶺有竹林寺寺西為唐金吾
僧說法臺

石門在縣西北四十里中條山王家井西北十里有黃

嶺石門 水經注鹽販之澤南面層山天巖雲秀池
谷泉深左右壁立間不容軌謂之石門路出其中名
之曰徑南通上陽北暨鹽澤

分雲山在縣西北四十里中條山一峰層巒峻岫走霧
分雲徑統羊腸殊難躋陟

橫嶺在縣北四十五里

西石山在縣東北四十里麓中石有仙人膝痕

清涼山在縣東北六十里中條山支巔殊曠灝可望蒲

解絳陝四州土人名四州圪塔晉執虞公於此

將軍汧在縣東北六十里石壁千仞下有石洞土人名
鑼鼓洞宮之奇嘗避此

顛軫坂在縣東北七十里虞坂南舊志謂三橋坂非也
劉昭注大陽有顛軫坂左傳曰入自顛軫博物記
曰在縣鹽池東吳城之北今之吳坂杜預曰在縣東
北 通典平陸有顛軫坂 相傳周穆王八駿經此
車為顛簸土人名軫嶠 王思誠詩山頭百折顛軫

坂

鹽坂在縣東北七十里

五家冢水經注軫嶠東北有虞原上道東又有虞城堯
妻舜以嬪於虞者也周武王以封泰伯弟虞仲於此
是謂虞公太原地記所謂北虞也城東有山世謂之
五家冢上有虞公廟

員村坂司馬光詩注其東八政水即古之傅巖有傳說
廟又東北虞城古虞公之國也

琴瑟穴唐志有琴瑟穴有銀穴二十四銅穴四十八在
覆釜三錐五岡分雲等山

翠陰巖 禹功巖 掛鼓石胥在三門山

覆釜山

五岡山

神仙洞

黃河在縣南三里自河津龍門至蒲州南至於潼關折
而東至芮城逾平陸東至於砥柱又東過垣曲下孟

澤 黃河在南門外又東北古焦國側水勢激湍

水經注河水湧起方數十丈有物居水中傳云銅翁
仲所投處又云石虎載經沉沒於此二物竝存水所
以湧 魏野平陸縣題寒食花藏縣重陽菊繞灣一
聲離岸櫓數點別洲山

鐵牛磧在縣東一里黃河中顧非熊平陸縣亭詩山與
中條合河逢一曲迴

開元新河在三門北有小河土人名公主河

盤南澗在縣東十里發源中條山繇石槽溝南下至盤南東入於河

沙澗在縣東二十里發源中條山東南谷至沙澗入河澗口多沙石

聖人澗在縣東二十五里發源馬跑泉下復有二泉合流嵌石滌洄遠傳巖南入於河一名八政水

清澗在縣東六十里相傳巢父洗耳處在箕山西

張谷澗在縣西二十里張峪村

圪塔澗在縣西二十五里圪塔村

南侯澗在縣西四十里南侯村發源中條山深溝夾流經南侯村至葛趙村又南流二里入於河

儀家溝在縣西五十里岳村右儀家溝東西為閒田址通典有閒原即虞芮之人讓畔處蘇氏曰虞在平陸芮在同之馮翊今平陸有閒原焉則虞芮之所讓也

五股泉在縣北一里水寒冽

三汭澗在縣北三里發源中條山東西二溝流至北三里五龍廟合流與大澗合至三汭口而崖斷支分東南入於河似交澗

響泉在縣北四十里中條山東水甘澄土人名響泉溝古焦水在縣東北五里有神農廟相傳武王封神農之後於焦即此 陝城中小城古焦國也平陸亦可緣引 水經注陝縣故焦國 竹書紀年幽王七年虢人滅焦

馬跑泉在縣東北三十里傳說塚下塚倚中條東西兩山環拱迴獻列屏泉殊清瑩相傳形求至此馬跑地得之合下石穴二泉至傳巖為聖人澗

馬頭澗在縣東北四十五里中條山麓危峰聳立兩谷二源環麓合流以山形似馬首名

芮城縣

中條山在縣北十五里逵高二十里東起首陽西接太行南北狹薄延袤不絕故曰中條又曰薄山

方山在縣西北三十里虞鄉縣界峯巒高峻其巔方平
一名檀道山是為城東西廣七十里胥屏倚方山也
山海經檀首山水經注鹽道山又名百梯山 唐
志河中府有檀道府 中條之首俯視五老峰巔有
鵞漿泉渟而不流下有檀道谷

檀道嶺在直岔嶺東自方山至檀道嶺胥中條山之析
名也

大峯在方山東

水谷在縣西北二十五里

大通嶺在縣西北中條山唐時竹影殊盛內有竹林寺
青龍洞在縣北三十里歷山東北三十里洞內有青龍
泉

百二十盤在縣北中條山之陰石磴盤旋而下北達虞
鄉即唐司空圖所隱王官谷也 倪光薦奇石詩偶
經百廿盤松石駭心目石以松為筋松以石為肉石
抱松如裹松穿石似束

甘棗山在縣東北三十五里青龍洞東二十里今名刺
林溝 括地志中條山亦名甘棗山 山海經甘棗
之山恭水出焉西流注於河

石鐘洞在縣東北三十五里甘棗山東十里有石室頂
懸石鐘水注其下禱雨多應相傳石鐘真人修煉地
嘗有蟬負芝來止石上又有野鹿入洞偕宿云石鐘
洞東五里為清涼寺又東十里為娥英廟又東為閒
田

直岔嶺在甘肅山東今名橫嶺 邵璿治中條山路記
中條直岔嶺四十里為赴郡省道南二十里屬芮北
二十里屬解徑皆緣崖臨溪高深數百丈北尤偏仄
石磊砢羸馬蹄爰命僧宗睿南北四十里之窄者坍
者甃者砥者悉舉而剗鑿之

南坡濱黃河岸水中有砂石高三尺大如礮上平下狹
河漲石獨露傳為呂望釣臺

黃河在縣南二十里 水經河水又東過河北縣南

水經注縣與湖縣分河、永樂澗水南流逕河北縣故城西故魏國也晉獻公滅魏以封畢萬卜偃曰魏大名也萬後其昌乎後乃縣之在河之北故曰河北縣也今城南西二面竝去大河可二十餘里北去首陽十里許處河山之間土地迫隘故魏風著十畝之詩也

白龍泉在縣南十里王家莊

小水泉在縣南十里太安村

葡萄澗在縣西二十里鄭村有五泉土人名五股泉南
流入河

觀音泉在縣西北十里

地皇泉在縣西北十三里山麓地皇氏廟前流經魏文
侯故城合通澤泉伏流入沙地皇通澤合為一渠

為汭水在縣西北三十里永濟界

三汭澗在縣北五里源出中條山東西二溝流與澗合
南入河

大安池在縣北五里流入黃河

龍泉在縣北五里古魏城中上有五龍祠 水經注城
內有龍泉南流出城又南斷而不流 金志有中條

山黃河龍泉

通澤泉在縣北八里古魏城西北合地皇泉伏流入沙
青龍泉在縣北三十里青龍洞禱雨多應

鹿跑泉在縣東北八里中莊村清澈見底一名靜深泉
上建龍神廟


奧祝泉在縣東北二十二里北山石巖下相傳魏文侯
率軍自安邑至默祝於此舉鞭得泉

恭水在縣東北三十五里源出甘棗山即今朱呂溝水
也 山海經蒲山之首曰甘棗之山恭水出焉而西
流注於河恭水當在中條山西鹿跑泉北三十五里
涇泉在縣東北五十里儀川溝源出清涼洞南入河一
名涇澤即涇津渡也土人名連塔溝

護生池董一桂記芮城之北泉壑紆曲決渠引水層折

五六里入城埴為池

萬蓬頭井明嘉靖時萬蓬頭過澗西王老人恒食之蓬頭曰當以五十金報因指屋後地掘井水大湧族里以五十金買溉村田至今井存



山西通志卷二十七